

01 掃便所的心適代

劉思瑤

「來，咱等一下欲換摒掃工課，這改予恁家己抽。」
Uah！閣欲換工課矣，這是予人期待閣驚受傷害的心情，因為阮這班摒掃的區域，包含一間全校上恐怖的便所，咧用這間便所的，齊是低年級的猴囡仔。

人講串驚串著，你愈無想欲拄著的，就愈會來揣你。買彩券嘛無遮好運，兩張掃便所的單仔，就予我抽著一張，天公伯仔，你哪會對我遮爾好啦！阮老師講，若有才調共便所掃甲予你家己都會想欲去遐啟放，按呢就成功矣。阮學校的便所佇我讀二年仔的時陣有翻過，新的便所會使講是海線地區的國校上嬌、上先進的。毋過經過這兩年，予逐家跣甲已經失去伊原本的模樣囉！

頭一擺去摒掃的時陣，我險仔共早起食的早頓吐吐出來。尿斗卡一沿尿滓黃黃厚厚，臭尿發味對樓梯行落來就鼻會著；兩間便所的壁頂、塗跤、馬桶攏有潑著黃金，垃圾的衛生紙嘛抨甲規四界，園衛生紙的所在閣擲一領穿過的內褲，誠癩癩，今這是發生啥物代誌？是遐的猴囡仔放尿相袂準？抑是共放尿當做咧沃花捎咧烏白漩？黃金的來源是上課毋敢共老師講尿咧滾，等到屎穢尻川矣才咧揣便所，所致走袂赴就沿路落？袂記得紮衛生紙只好用內褲拭？繼

落來垃圾的內褲規氣褪掉無愛穿？抑無，一間「五星級」的便所，哪會舞甲這號形。

我從轉去教室共老師講這個狀況，老師來看了，隨提一罐洗碗精、一罐酒精佮兩副手囊予我，叫阮兩個共摒予清氣，我閣加掛兩個喙罨，準備欲來佮伊摔拚。頭起先，阮兩個攏無想欲去處理遐的垃圾仔，毋過遮的物件無清掉，賭的工課嘛袂做得，阮只好用喝拳彼步，贏的人愛處理。天公伯仔閣佮我滾耍笑，又閣是我啦！真正是欲哭無目屎。

我這個愛清氣相的看袂做得，就早暗拚命鏹，經過兩禮拜，總算共尿滓和黃金攏鏹掉矣，阮共彼間全校上癩癩的便所，洗甲金爍爍閣清氣溜溜。

這馬我攏會專工對樓頂走落來用這間我家己摒的便所囉！